

Plan da la citad da Cuira – per uffants

La citad da Cuira ha edì in plan per scuvrir ils museums da quest lieu

■ **(anr/grc) La citad da Cuira ed ils trais museums chantunals, numnadamain il Museum retic, quel da la natira sco er il Museum d'art dal Grischun sut il patronadi dal departament d'educaziun, cultura e protecziun da l'ambient presidià da cusseglier guvernativ Claudio Lardi e in pèr scolars da Cuira han ier preschentà quest plan creà aposta per uffants e famiglias.**

Cun agid dal «plan per uffants per la citad da Cuira» è vegnì realisà in plan che maina sin moda e maniera divertenta e termaglianta tar ils trais museums chantunals. I saja temp dad ir ina via nova or dals museums «antiquads e plains pulvra», ha er il cusseglier guvernativ Claudio Lardi fatg a savair ier a chaschun da quella orientaziun als meds da massa. Quella ha entschavì en il Museum retic ed è vegnida guidada da scolars primars. Il chalzer dal cusseglier naziunal Claudio Lardi «è in pau memia pitschen» per la mesira dal pe che sa chatta vi da la fatschada da la chasa-cumin da Cuira, ha in scolar manegià durant che el ed auters han guidà ils trais directurs dals museums chantunals ed ils pedagogs da quels tras la citad da Cuira.

Eveniment unic

Il nov plan da citad per uffants pussibilitescha ad uffants e fami-

glias da far daventar quella spasegiada in vair eveniment. Da tuttas sorts infurmaziuns e lezias, tut en tut 20 posts, mainan a l'effect final tar ils trais gronds museums chantunals. «Pitschnas fermadas e lezias d'observar ed attracziuns chaschunan gia che la via tar ils museums è in viadi d'exploraziun», èsi vegnì communitgà.

Il plan è illustrà confurm als uffants ed è vegnì concepì e realisà da pedagogas e pedagogs da museum, numnadamain da *Flurin Camenisch*, *Barbara Redmann*, *Sabina Studer* e da *Charlotte Schütt* responsabla per il marketing da cultura/PR.

Svegliar tschaffen e mirveglias

Il plan da la citad da Cuira per uffants duaja svegliar il tschaffen e las mirveglias per giuvens visitaders da museum sco er per famiglias. Da quellas cun uffants tranter tschintg e dudesch onns sco er classas da scola u er gruppas da vacanzas èn las gruppas en mira da quest plan da citad per uffants. Quel plan gratuit na sa drizza betg mo a la populaziun indigena, mabain ha en il medem mument er muntada turistica. I sa tractia d'in plan per far daventar ina visita a la citad da Cuira attractiva er per famiglias da la Bassa e da las destinaziuns da vacan-

zas vischinas, èsi vegnì communitgà ier a Cuira. Ins po survegnir quest plan da citad per uffants davart dals museums grischuns tar Tourist Info a la staziun a Cuira, tar las uniuns da traffic sco er en differents auters lieus.

20 posts, da l'Alexanderplatz enfin il Museum da la natira

Dumondas sco: «Tge color ha la cabina da la pendiculara che maina ord la citad da Cuira?», «Tge chasa è la pli veglia da Cuira?», «Tge furma ha il battaporta da la chasa da la regenza?». Cun responder questas dumondas pon uffants e creschids emprender ad enconuscher la citad da Cuira. Ultra da quai duain ils uffants er dumbrar quantas plazzas da parcar che sa chattan sper il Museum da la natira u tadlar la ramur da l'Ual-mulin da Cuira che curra oz per la gronda part sut la terra. Er en ils trais museums chantunals pon ins scuvrir chaussas extraordinarias, anticas, raubas che ins nun ha anc mai vesi, en mintga edifizis sa chatta in lieu da scuntrada cun gieus e lezias e da là or entschaiva il viadi tras il museum, uschia vegn il nov plan per la citad da Cuira descrit.

Uras d'avertura: Tut ils trais museums èn averts dal mardi enfin dumengia da las 10.00 enfin las 17.00. Glindesdi èn quels serrads. Entrada libra per uffants e giuvenils enfin 16 onns.



La mesira pe da Cuira en la Reichsgasse, là nua che commerziants dal sid e dal nord s'entupavan e mesiravan rauba durant il temp medieval.